

Korrika 11 1+1=hamaika

Gipuzkoa, korrikalariz gainezka

Jendeak harrera paregabea egin zion atzo Korrika 11ri Gipuzkoako errepide eta kaleetan barna

Arantxa Iraola / Azpeitia

Iruten sartu zen atzo goizaldean Korrika 11. Lasterketak aurten Gipuzkoan egindako lehenengo urratsak izan ziren horiek. Modu horretan korrikalariek aurki, gauerdiko ordu txikietan, 1.125. kilometroa osatu zuten, eta gustu askora aldarrikatu zuten Korrika-ko ibilbide erdia egina dela. Ondoren, Gipuzkoako hamaika herri zeharkatu zituen lasterketak, eta guztietan jendea oldeka hurbildu zen.

KORRIKALARIZ osatutako ibai zabal batek zeharkatu zituen atzo Gipuzkoako kale eta karrikak. Irundik -Hendaia- bisitatxo bat egin ostean -sartu zen lasterketa Gipuzkoan, eta Korrika 11ko jardunaldirik arrakastatsuenetakoa abian jarri zen. Egunsentian jada, esaterako, une hunkigarria izan zen Gaintxurizketako gaina baino kilometro batzuk lehena go, 1.125. kilometroa zeharkatu baitzuten korrikalariek. Ondorioz, aurten atondutako ibilbidearen erdia jada eginda dagoela ospatu zuten xanpain apur batez. Goizeko ordu txikietan, halaber, une hunkigarria izan zen Pasaian, Pasai Donibane eta Pasai San Pedro artean traineruan igaro baitzuten Korrikako lekukoa.

Jarraian, barrualderako norabidea hartu zuen lasterketak. Erreterria, Oiartzun, Andoain, Aduna... Festa giroan egin zioten harrera udalerri horietako herritarrek Korrika 11ri.

Festa giro hori apaldu egin zen atzo, hala ere, Zizurkil. Bertako seme Jose Luis Gerestaren heriotza berriak samindurik, bozgorailu handi batzuetatik aieratzen duten musika alaia isiltzea erabaki zuten Korrikaren antolatzaileek. Zizurkildar askok, berriz, krespoi beltzez hornituriko ikurrinekin lasterka eginez azaldu zuten duten samina.

Ordizian ohorezko korrikalariak

Alaitasun giroa aurki berreskuratu zuen, hala ere, Korri-



GARI GARAIALDE

Korrikaren etorrerarekin Hernaniko kaleak jendez bete ziren atzo goizean goiz.

Korrika, gorri, berde eta zuria?

lekukoa

ARANTXA IRAOLA

OIHAL zuri-berde-gorria du itsatsirik Korrikaren lekukoak, euskal aberriaren ikurrina. Kolore horiek islatzen al dute, ordea, zer den Korrika? Berdeak, akaso, lasterketaren paisaia isla dezake, Euskal Herriko zelai muskerak bistan direla egiten baitira kilometro ugari. Berdeak, halaber, agian, esperantza isla dezake, horixe baitio koloreen munduko sineskeriak, berdeak esperantzaren esanahia duela bere baitan. Gorria, halaber, egokia izan daiteke Korrikaren berri emateko, gorri-gorriak izaten baitira lasterkarien musuak lasterka ari direnean eta gorritak gure aho eta ezpainak bero-bero eginik euskararen aldeko oihuak aldarrikatzen ditugunean. Eta, ezin uka, zuriz ere jantzia da Korrika. Zuri-

zuriak ziren, esaterako, Erronkarin barna egindako etapan ikus zitezkeen mendi tontor elurtuak, eta zuri-zuri geratzen dira hainbat lasterkari ezinean karrerak ihes egiten dienean.

Hitzek, berriz, behin eta berriz Korrikan errepikatzen diren hitzek, zein kolore dute? Euskarari bai! Euskal Herrian Euskaraz! Hemen gaude euskararen alde!... Arnasik hartzeko tarterik gabe errepikatzen ditu hitz horiek lasterketa euskaltzaleak, eta arnas esturik larrietan ere tinko erantzuten saiatzen dira lasterkariak, gogotsu. Une ederrak izaten dira horiek, gozatzekoak. Gozamen oro apurtuko luke, ordea, hitz horiek zuriak direla jakiteak. Izan bitez, ostadarraren kolorekoak.

kak. Iruran, Tolosan, Itsasondan, Ordizian... Horietan guztietan berriz ere festa giroa izan zen jaun eta jabe, eta arreta bizia piztu zuten maisu-maistren alboan Korrikara joan ziren ume andana handiek.

Ordizian, ume pilo batez gain, ohorezko zenbait korrikalari izan ziren atzo, AEK-k zientziaren mundua euskalduntzeko ahaleginetan ari diren guztiak omendu nahi

baitzuten. Guztien ordezkari moduan EHUKo irakasle Pedro Miguel Etxenike zientzialari ezaguna hautatu dutenez, arrunt gustura egin zuen hark Ordizian barna atzoko kilometro berezia. Alboan, gainera, oso hurbileko adiskideak izan zituen, guztiak zientzia euskalduntzeko ahaleginetan ari direnak. EHUKo irakasle kalera-tu bat, Joxerra Etxebarria, esaterako, hantxe zen.

Arratsalde partean, berriz, Urolaldean -Azkoitia- eta Azpetian- izan zen lasterketa eta iluntzean Elgoibarren, Eibarren, Soraluzen, Bergaran eta Antzuolan. Guztietan, eguraldiak txarrera egin bazuen ere, jendea ugari izan zen.

Gaur, berriz ere, arabarren txanda izango da, gaueko ordu txikietan hantxe sartuko da Korrika 11, euskaltzaleen lasterketa.

Pedro Miguel Etxenike eta Joxerra Etxebarria, muslari

MUSEAN harrapatu genituen atzo Ordiziako taberna batean bi zientzia gizon handi: Joxe Ramon Etxebarria eta Pedro Miguel Etxenike. Ofizio berekoak izaki, gustura ari ziren atzo biak bikotekide bana alboan zutela, elkarren aurka musean. Ondoren jakin ahal izan genuenez, Etxenikek eta bere bikotekideak irabazi zuten lehia txikia. Ez zen kokildu, hala ere, Etxebarria, dotoreziaz galtzen ere ondo aski ikasi duela argi utziz. Bi gizon hauek Ordizian bat egiteko arrazoia, noski, Korrika 11 zen. AEK-kideek zientzia mundua euskalduntzeko ahaleginetan ari diren guztiei omenaldia eskaini dietenez, atzoko kilometro berezian lasterka egiteko gonbita egin zieten.

Lastargien argipean lasterka

Astearte iluntzean eta ondorengo ordu txikietan -Bortzirietan barna ibili zen Korrika- udalerri askotan harrera arrunt polita egin zioten lasterketari, suz pizturiko lastargiz egin baitzioten korrikalariek bidea. Bestela ere oso ondo argiztaturik ibiltzen da Korrika 11 errepidez errepide, baina korrikalarien zuziek, duda izpirik ez, oso itxura berezia ematen diote lasterketari.

Donostiara garaiz irits dadin

Puntu-puntu iritsi nahi du Korrikak igandean Donostiara. Horretarako, gogoz ari dira lanean antolatzaileak. Hala ere, oso lasterketa luzea izaki, ohikoak izaten dira atzerapen edo eta aurrerapen txikitxo batzuk. Hamar minutu aurrera, hoge minutu atzera... Baina Donostiara garaiz iritsi dadin egin beharreko guztiak gogoz egingo dituzte antolatzaileak. Izan zaitezte ziur.